

Na letasi nigna Pol vanira na komi Tinoni Kiloau i Kolosi

Na Titiono Eigna Na Letasi Iaani

Kolosi sina meleha ke mono etagna na meleha hutu i Efesus kori provins i Esia, mi mara Rom kena vunaghi pungusia. Na mane vetula a Pol ke boi vano kori meleha Kolosi, keana kori vido ke mono i Efesus, imanea ke vetula kekeha mara kena agutu duagna bali titionoa na Rorongo ke Toke ngengeni. Kori vido a Pol ke risoa na letasi iaani, imanea ke mono kori vathe tatari i Rom.

Pol ke rongovia kekeha mara velepuhi piapilau kena mono i Kolosi. Imarea kena velera na komi tinoni kiloau ngengeni, e toke gi kedana maimanihihia na komi enjel. Mena velera mua eigna kedana leghua na komi vetula nigna Moses vaghagna na sogivaughithatha mena lutia na ghaniagna kekeha vanga.

Pol ke risoa na letasi iaani itadia na komi tinoni kiloau i Kolosi eigna ke magnahaghinira kedana boi leghua na komi velepuhi piapilau. Pol ke velera na leghuragna na komi vetula irangeni keda diadikala nidia na vaututuni tagna a Jisas. Imanea ke velera a Krai ke vavuhara na komi fata gougovu kori maramagna, ma na vunegna vamua na hava ke eia a Jisas, a God ke lubatira na komi tinoni kori maramagna eigna kedana mai itagna. Pol ke magnahaghinira kedana ado toetokea na vaututuni tagna a Jisas vamua ke tangomana na vajinoragna kori matagna a God.

Na komi fata ke nagho kori letasi iaani:

Na komi puhigna ma na agutu nigna a Jisas Krai (1:1-2:23)

Na puhi ke nabadia arahai kena hatia na havi mathangani (3:1-4:18)

¹ Inau a Pol, nigna na mane vetula a Jisas Krai eigna a God ke vahiu, ku risoa na letasi iaani. Timoti a kulada kiloau ke mono duagu eeni.

² Inau ku risoa atu itamiu ighamu na komi tinoni nigna a God koti mono kori meleha i Kolosi. Ighamu koti sokara ngasi kori nimiu na vaututuni tagna a Jisas Krai. Inau ku tarai gi a God a Tamada keda vatokeghamu me heghamu na soleana kori havimiu.

Na Tarai Veletokeagna A God

³ Kori vido kiti tarai eimiu ghamu, ighami kiti veletokea God a Tamagna nida a Lod Jisas Krai,

⁴ eigna ighami kiti rongovia ighamu koti vaututunia Jisas Krai moti dothovira na komi tinoni gougovu nigna a God.

⁵ Ighamu koti eia iangeni, eigna ighamu koti vaututunia kotida hatia na komi fata ke toke a God ke kaikaliti vanighamu i popo. Ighamu koti rongovia ghohi eigna na komi fata ke toke irangeni kori vido kena titiono vanighamu na Rorongongo ke Toke, na rorongogna a God ke tutuni.

⁶ Na Rorongongo ke Toke iangeni ke rongoragha ivei mi vei. Sethe na tinoni kena vaututunia mena tughua na havidia. Iaani e nanaba vamua tagna na hava ke tate mai itamiu turughu kori vido koti kidi rongovia eigna na dotho ke hutu

nigna a God moti thaothadoghagna na pukuni ghaghanagna na dotho iangeni.

⁷ A Epafaras, a pukuni kulada ke agutu dua-mami, imanea na mane ke kidi titiono na Rorongo ke Toke itamiu. Imanea sina mane agutu ke toke nigna a Krai, me agutu itamiu kori huhulumami ghami.

⁸ Ma Epafaras ke titiono itamami ighamu koti dothovira na komi tinoni nigna a God kori dotho na Tarunga ke Tabu ke heghamu.

⁹ Na vunegna iangeni, turughu kori vido kiti rongovia na rorongomiu, ighami kiti boi soto na tarai eimiu. Ighami kiti tarai kaea a God gi keda tatelia vanighamu na hava ke magna-haghinighamu kotida eia. Miti kaea mua eigna keda vathaothadoghaghamu me hatheghamu eigna kotida thaothadoghagna na komi puhigna imanea kori haehathe nigna na Tarunga ke Tabu.

¹⁰ Ighami kiti kaea a God gi keda eia iaani vanighamu eigna kotida leghua na puhi ke nabadia na komi tinoni nigna a Lod, ma a Lod keda totogo eidia na komi fata gougovu koti eia. Gi keda tutuni iaani eimiu ghamu, ighamu kotida eia na hava ke toke vanira na komi tinoni ma na nimiu na thaothadogha eigna a God keda vuragha.

¹¹ Mi ghami kiti tarai kaea a God gi keda vahetaghamu kori nigna na mana ke hutu puala eigna kotida sokara ngasi moti ghathapaku kori vido na komi papara ke padaghamu moti mono totogo.

¹² Oti veletokea a God a Tamada eigna imanea ke vatangomanaghamu eigna kotida ha-

tia na komi fata ke taluhaghorea keda heghamu ighamu nigna na komi tinoni kotida mono kori hughuta i popo ke siasilada.

¹³ I hau ighita kati mono kori puni ma Satan ke vunaghi pungusia na havida. Keana ikeagaieni a God ke vaumamaluhaghita. Ma a Dathegna ke dothovia, imanea ke vunaghi pungusia na havida.

¹⁴ A God ke vamamaluhaghita me talutavogha na komi paluhada tagna na hava ke eia a Dathegna.

A Krai Ke Nagho Vano Tadia Na Komi Fata Gougovu

¹⁵ Teo katida reghia a God, kari a Dathegna ke tatelia na komi puhigna itada eigna imanea ke nanaba vamua duagna a God. Krai ke nagho vano tadia na komi fata gougovu a God ke vavuha,

¹⁶ eigna imanea ke agutu duagna a God kori vavuharagna na komi fata gougovu i popo mi thepa. Imanea ke vavuhara na komi fata gougovu kati reghia mati boi reghia vaghagna na komi enjel ma na komi tarunga kena mono nidia na mana ke heta. Duagna a Krai, a God ke vavuhara na komi fata gougovu, me vavuhara vania a Krai.

¹⁷ A Krai ke kidi mono tadia na komi fata gougovu irangeni, mi manea ke tangoli haidura.

¹⁸ A Jisas Krai na ulugna na kiloau ma na komi tinoni kiloau na tonogna imanea. Imarea kena hatia na havi mathangani itagna a Krai, eigna imanea ahai a God ke kidi vahavi tabirua kori thehe me teo mua keda ghoi thehe. A God ke eia

iangeni eigna a Krai keda nagho vano tadia na komi fata gougovu.

¹⁹ Kori vido a Krai ke mai kori maramagna, imanea ke nanaba duagna a God, eigna iangeni na hava ke magnahaghinia a God.

²⁰ Tagna na hava ke eia a Krai, a God ke hati tabirura na komi fata gougovu i thepa mi popo eigna kedana mono haidu toetoke duagna. Na vunegna a Krai ke thehe vaghagna na havughaghi kori ghaibabala, na komi fata gougovu ke tangomana na mono kori soleana duagna a God.

²¹ I hau ighamu koti mono haunia a God. Ighamu koti thevuioka itagna eigna na ghaghanamiu ke dika ma na komi fata koti eia ke dika.

²² Kari ikeagaieni, na vunegna a Krai ke havi mai kori tono i tinoni me thehe, a God ke hatighamu itagna imanea ghehegna moti mono ghohi kori soleana duagna. A God ke eia iaani eigna kori vido ighamu kotida sokara naghogna, imanea keda vele aua ighamu koti pukuni jino me teo ahai keda toroghamu tagna sa fata.

²³ Keana oti talu vaututunia a Krai moti sokara ngasi kori nimiu na vaututuni. Saghoi lubatia sa tinoni eigna kedana vasotoghamu na vaututuniagna a God keda eia na komi fata ke taluhaghorea itamiu kori Rorongo ke Toke koti rongovia ghohi. Na Rorongo ke Toke iaani, imarea kena titiono aua ghohi tadia na komi tinoni ivei mi vei kori maramagna. Mi nau, a Pol, a God ke vahiu eigna kuda titiono aua na Rorongo ke Toke iaani.

Na Agutu Ke Eia A Pol Tadia Mara Kiloau

²⁴ Toke inau ku papara eigna na agutu ku eia, inau ku totogo vamua eigna ku adoa na agutu ku eia ke hatheghamu. I hau a Krai ke papara bali hathera nigna na komi tinoni. Ikeagaieni inau ku sasaa kuda papara mua bali hathera na komi tinoni kiloau.

²⁵ Inau ku agutu vanira na komi tinoni kiloau eigna a God ke vahiu eigna kuda eia iaani bali hatheghamu. Nigua na agutu bali velepuhighamu na komi fata gougovu kori Rorongu ke Toke.

²⁶ I hau a God ke poloa na rorongu iaani tadia na komi tinoni gougovu, kari ikeagaieni imanea ke tatelia vanira nigna na komi tinoni.

²⁷ A God ke eia iangeni eigna ke magnahaghinia nigna na komi tinoni kedana adoa na rorongu iaani ke velea imanea keda pukuni vatokera na komi tinoni kena boi Jiu. Ma na rorongu iangeni vaghagna iaani: Jisas Krai ke mono kori havimiu ighamu koti boi Jiu, ma na vunegna iangeni ighamu koti adoa kotida mono i popo duagna a God koragna nigna na mana ke hutu puala.

²⁸ Ighami kiti titionoa Jisas Krai tadia na komi tinoni gougovu. Ighami kiti vavotura miti velepuhira kori thaothadogha a God ke heghami. Ighami kiti eia iaani eigna ighami kiti magnahaghinira na komi tinoni kedana pukuni heta kori nidia na vaututuni kori vido imarea kedana sokara naghogna a God.

²⁹ Iangeni na vunegna inau ku agutu heta. Mi nau ku agutu kori na mana hutu ke heu a Krai.

2

¹ Inau ku magnahaghinighamu gi ighamu kotida adoa inau ku agutu heta bali hatheghamu ighamu koti mono i Kolosi ma na komi tinoni kiloau i Leodisia ma na komi tinoni kiloau kena boi reghiu mua.

² Inau ku eia na agutu iaani bali vaheta na ghaghanamiu mu magnahaghinighamu kotida veidothovighi eigna keda toke nimiu na mono haidu. Inau ku magnahaghinia na ghaghanamiu keda heta eigna kotida pukuni thaothadoghagna na rorongogna a God ke poloa i hau. Ma na rorongongo iangeni a Jisas Krai.

³ Ma Krai vamua ke tangomana na hatheghamugna eigna kotida thaothadoghagna nigna na thaothadogha a God ke nagho vano.

⁴ Inau ku veleghamu iaani eigna u boi magnahaghinia sa tinoni kedana pilaunighamu tagna na komi titiono ke toke puala na rorongogna kari e boi tutuni.

⁵ Toke inau ku boi mono duamiu, inau ku toghaghamu hahali. Inau ku totogo puala eigna ighamu koti leghua na puhi ke jino moti sokara ngasi kori nimiu na voututuni tagna Jisas Krai.

Na Havi Ke Tutuni Ke Mono Tagna A Krai

⁶ Na vunegna ighamu koti hatia ghohi a Jisas Krai kori havimiu eigna keda nimiu na vunaghi, oti leghua na hava ke magnahaghinighamu kotida eia.

⁷ Oti sokara ngasi kori nimiu na voututuni tagna a Krai, vaghagna na ghai ke horu na oghagna kori thepa. Moti vaheta nimiu na voututuni tadia na komi fata gougovu kena

velepuhighamu eigna a Kraiss, moti veletokea a God eigna na komi fata ke eia vanighamu.

⁸ Oti saghoi lubatira mara na velepuhi piapilau gi kedana pilaunighamu eigna kotida voututunia nidia na komi velepuhi. Na rorongogna nidia na komi velepuhi ke toke puala, kari e boi tutuni me boi tangomana na hatheghamugna. Nidia na velepuhi, na komi vetulagna na maramagna iaani vamua ke au mai kori ghaghanadia na komi tinoni me boi mai tagna a Kraiss.

⁹ Toke a Kraiss ke havi mai kori tonogna na tinoni, na komi puhi ma na mana nigna a God ke mono itagna.

¹⁰ A Kraiss ke vunaghi pungusira na komi enjel ma na komi tidatho ma na komi tarunga. Ma na vunegna ighamu koti mono haidu duagna, ighamu koti hatia ghohi na havi ke tutuni.

¹¹ Na vunegna ighamu koti mono haidu duagna a Kraiss, ighamu vaghagna koti sogivaughithatha ghohi, kari boi na sogivaughithatha kori tono. Na sogivaughithatha ke utuhia aua na ghuighuli kori tono. Vaghagna iangeni a Kraiss ke hati aua nimiu na komi vanohehe ke dika.

¹² Kori vido koti siuvitabu, ighamu vaghagna koti thehe mena gilughamu duagna a Kraiss gi oti ghoi havi tabiru duagna bali hatia na havi mathangani. Iangeni ke tutuni eigna ighamu koti voututunia na mana nigna a God, na mana ke tateli aua kori vido imanea ke vasokara tabirua Kraiss kori thehe.

¹³ I hau, ighamu vaghagna koti thehe ghohi eigna koti eia hahalia na komi fata ke dika, ma a God ke boi hatia aua mua na komi nimiu na

vanohehe ke dika. Keana ikeagaieni, ighamu vaghagna koti ghoi havi tabiru duagna a Krai. Ighamu koti hatia na havi mathangani eigna a God ke talutavogha na komi paluhada.

¹⁴ God ke reoa aua ghohi na komi paluhada kena risoa kori pepa bali fateghita. Imanea ke hatia na pepa iangeni me tupia kori nigna na ghaibabala a Krai.

¹⁵ Kori vido iangeni, a God ke hati aua na mana nidia na komi tidatho ma na komi tarunga ke dika. Ma God ke tatelia vanira na komi tinoni gougovu a Krai ke heta pungusira na komi tidatho ma na komi tarunga kori vido ke thehe kori ghaibabala.

¹⁶ Na vunegna iangeni, oti saghoi vaovarongo itadia arahai kena vele diadikalaghamu eigna koti boi leghua nidia na komi vetula eigna na hava ke jino bali ghania ba kouvia. Ba nidia na komi vetula eigna na komi dani ke nagho, ba na dani bali ghaghana bohea na vula mathangani, ba na Sabat.

¹⁷ Oti saghoi vaovarongo itadia, eigna na komi vetula irangeni boi na naghoi fata. A God ke hera na komi tinoni Jiu na komi vetula eigna kedana adoa imanea keda vetula maia a Vahavi. Ma Krai hiri, a Vahavi, imanea na naghoi fata.

¹⁸ Oti saghoi vaovarongo tadia arahai kena veleghamu oti boi jino gi kotida boi vohorughamu ghehemiu moti boi maimanihia na komi enjel. Gi kotida vaovarongo itadia, teo kotida hatia na tabamiu a God ke taluhaghorea keda hera nigna na komi tinoni. Na komi tinoni kena velepuhighamu na komi

fata irangeni, imarea kena velea a God ke tatelia vanira. Imarea kena tautalunagho eigna na komi ghaghanadia ghehedia kari na tautalunagho iangeni teo sa vunegna.

19 Na komi tinoni irangeni ena boi tatango ngasi tagna na velepuhi ke tutuni eigna a Krai, na ulugna na tonu. Imanea ke vunaghi pungusira na komi tinoni kena voututuni me hatheghita eigna katida mono haidu toetoke. Gi katida totho thovohaliu tagna a Krai, a God keda hatheghita eigna katida heta vano mua kori havida duagna a Krai.

20 Na vunegna na havimiu haulaghi ke thehe ghohi duagna a Krai, ighamu koti boi mono ghohi saragna na komi vetulagna na maramagna. Na vunegna iangeni ehava gi oti talu leghua na komi vetula vaghagna iaani,

21 “Saghoi tangolia na fata iaani, ba saghoi ghania na vanga iaani, ba saghoi tugelia na fata iangeni.”?

22 Na komi vetula iraani, na ghaghanadia na komi tinoni vamua eidia na komi fata keda govu leghugna kati ghania ba tangolia.

23 Na komi vetula iraani kena velepuhighita eigna katida eia na komi fata ke vahotha bali maimanihihia a God, mati vahouhoughita gheheda, mati vapara na tonoda. Na komi vetula iraani vaghagna kena tangomana na vathaothadoghaghita. Kari e boi tutuni, eigna kena boi hatheghita eigna katida reireghighita gheheda tadia na komi fata ke magnahaghinia nida na komi vanohehe ke dika.

3

Leghua Na Puhi Ke Vatotogoa A God

¹ Vaghagna ighamu koti sokara tabiru ghohi kori thehe duagna a Krai eigna a God ke heghamu na havi mathangani. Na vunegna iangeni, oti magnahaghinia vamua na leghuagna na puhigna a Krai ke mono i popo. Ingengeni imanea ke nohe kori madothogna a God.

² Moti togha hahalia na leghuagna na puhu ke nabadia na komi tinoni nigna a Krai ke mono i popo. Saghoi togha mua na eiagna na komi fata ke dika kena eia na komi tinoni kori maramagna.

³ Oti eia iaani eigna ighamu vaghagna koti thehe ghohi, ma na tinoni ke thehe ke boi tangomana mua keda ghoi eia na komi puhu ke dika. Mi keagaieni ighamu koti sikei duagna a Krai kori matagna a God. Ma na komi tinoni kena boi vaututuni kena boi thaothadoghagna na havimiu ke mathangani.

⁴ Krai ke heghamu na havimiu ke mathangani. Kori vido imanea keda ghoi tabiru mai kori maramagna, ighamu kotida mono duagna koragna nigna na mana ke hutu puala.

⁵ Na vunegna koti hatia ghohi na havi ke mathangani, oti soni aua kori havimiu na komi puhu ke dika koti eia i hau. Saghoi nere duadia arahai kena boi ara taumiu, ba eia na komi fata keda vamaomamoghita na titionoagna, ba mamagna tinoni. Moti saghoi magnahaghinia na eiagna na komi puhu ke dika. Saghoi magnahaghinira puala na komi fata ke sethe kori maramagna. Gi kotida eia iangeni, ighamu

vaghagna koti maimanihihira na komi fata koti magnahaghinia.

⁶ A God keda vaparara arahai kena boi leghua mena eia na komi puhi ke dika irangeni.

⁷ Na komi puhi irangeni, ighamu koti eia i hau kori vido koti boi vaututunia mua a Jisas.

⁸ Keana ikeagaieni, oti taveti sania na komi puhi ke dika iraani: na dikatamiu, ba na eiagna ba veleagna na hava keda vadiadikalara na komi tinoni, ba na hiraragna.

⁹ Moti saghoi veipiapilaughi. Saghoi eia na komi fata iraani eigna ighamu koti taveti sania ghohi na puhi ke haulaghi ma na komi fata ke dika koti eia i hau.

¹⁰ Ikeagaieni ighamu koti hatia ghohi na puhi mathangani. A God ke heghamu na puhi mathangani iangeni, mi manea keda talu vajinoghamu moti ghieghilei vaghagna imanea. Mi ghamu kotida adoa toetokea imanea.

¹¹ Na vunegna a God ke heghita na puhi mathangani, e toke ighoe na tinoni Jiu ba teo, ba ighoe ko sogivaughithatha ba teo, ba ighoe ko adoa haghore Grik, ba ighoe ko boi sikolu, ba ighoe na tinonimu i hothoho, ba ighoe na tinoni seka, ba ighoe na tinoni mamaluha. E toke vamua eigna a Krai ke haluhadi vano tagna na komi fata gougovu, mi manea ke mono kori havidia nigna na komi tinoni.

¹² A God ke dothovighamu me vahighamu eigna kotida nigna na komi tinoni. Na vunegna iangeni, oti hathera arahai kena boi tangomana na hatheragna ghehedea, moti eia na hava ke toke vanira na komi tinoni, moti mono taluleghu,

moti rongovira arahai tavogha, moti saghoi saisami na dikatamiu.

¹³ Oti mono haidu toetoke, moti talutavogha na paluhadia sa tinoni ke eia na hahi itamiu, vaghagna a Lod ke talutavogha na paluhamiu.

¹⁴ Kari na hava ke nagho vano tadia na komi fata ke toke iraani: ighamu kotida veidothovighi. Eigna kori vido koti veidothovighi, ighamu kotida mono haidu kori soleana.

¹⁵ Ighamu gougovu na baebasegna na tonogna a Krai, ma God ke vahighamu eigna kotida mono haidu kori soleana. Na vunegna iangeni, oti lubatia na soleana ke mai tagna a Krai eigna keda vunaghi pungusia na ghaghanamiu. Moti saghoi havaghinia na veletokeagna a God.

¹⁶ Oti lubatia na rorongogna a Krai eigna keda vonungia na havimiu kori vido ighamu koti veivelepuhighi moti veivajinoghi ghehemiu kori thaothadogha. Moti salea na komi Psalm, ma na komi hymn ma na komi sale tabu vania God eigna ighamu koti totogo eigna na komi fata ke toke ke eia vanighamu.

¹⁷ Na komi fata koti velea moti eia, oti eia kori puhi keda tateli aua ighamu koti leghua ghohi a Lod Jisas. Moti veletokea a God na Mama hahali eigna na hava ke eia vanighamu a Jisas.

Na Komi Puhi Ke Jino

¹⁸ Ighamu na koi vaivine koti taulaghi, oti leghua na haghoredia ara taumiu, eigna iangeni na puhi ke jino kedana eia na koi vaivine kena vaututunia a Lod.

19 Ighamu mara mane koti taulaghi, oti dothovira ara taumiu moti saghoi dikatamiu hahali itadia.

20 Ighamu na komi gari, oti leghua na hava ke veleghamu a idomiu mara tamamiu, eigna iangeni na hava ke magnahaghinia a God kotida eia.

21 Ighamu ara tamadia na komi gari, oti saghoi ngarara hahali ara dathemiu. Kenughua ena dikatadia mena boi sasaa na leghuagna na puhi ke jino.

22 Ighamu na komi tinoni seka, oti leghura hahali na komi vunaghimiu. Saghoi agutu heta vanira kori vido vamua kena reghighamu eigna kedana veletokeghamu. Teo. Agutu heta vanira thovohaliu. Na vunegna ighamu koti ghaghana bohea a Lod, oti agutu vanira tagna na komi nimiu na toatogha ke toke.

23 Na komi agutu koti eia vanira, oti eia kori hetamiu doudolu, vaghagna koti agutu vania a Lod, boi vanira na komi tinoni.

24 Oti eia iaani eigna ighamu koti adoa a Lod keda tabaghamu eigna na agutu koti eia. Ighamu kotida hatia na komi fata ke toke a Lod ke taluhaghorea vanira nigna na komi tinoni. Oti saghoi havaghinia a Krai na vunaghi ighamu koti agutu vania.

25 E toke gi ighamu kotida thaothadoghagna a God ke boi thevu tagna ahai. Imanea keda vaporara arahai kena eia na komi fata ke dika.

4

1 Ighamu na koi vunaghidia na komi tinoni

seka, oti kaliti toetokera moti eia vanira na hava ke jino eigna ighamu huju oti agutu vania mua na vunaghimiu ke mono i popo.

Pol Ke Kaera Na komi Tinoni Kiloau Eigna Kedana Tarai

² Oti tarai hahali. Kori vido koti tarai tagna a God, oti veletokea imanea moti saghoi toali.

³ Oti tarai eimami ghami eigna a God keda hangavia vanighami na hangana bali titiono na rorongogna a Krai kena boi adoa na komi tinoni i hau. Ikeagaieni inau ku mono kori vathe tatari na vunegna inau ku titiono na rorongoga iangeni.

⁴ Moti tarai eigu eigna kuda titiono aua na rorongoga iaani tadia na komi tinoni. Iangeni na puhi ke jino kuda eia.

⁵ Kori vido koti mono duadia arahai kena boi voututunia a Krai, na komi fata koti eia, oti eia kori thaothadogha. Gi kotida tangomana na eiagna vanira sa fata keda hathera eigna kedana voututuni, oti eia vamua.

⁶ Kori vido koti titiono duadia, na komi haghoremiu keda toke me jino eigna kedana sasaa na vaovarongo itamiu. Gi kotida eia na komi fata irangeni, ighamu tangomana kotida haghore tughura arahai kedana huatighamu eigna na hava koti voututunia.

Na Vagovui Haghore

⁷ Tikikus, a pukuni kulagu kiloau, imanea keda titiono vanighamu na rorongogu inau. Imanea na mane agutu ke toke ke agutu vania a Lod duagu.

⁸ Inau ku veleagna eigna keda atu itamiu eigna inau ku magnahaghighamu kotida adoa na hava ke padaghami eeni. Mu magnahaghinia mua imanea keda atu vaheta na ghaghanamiu.

⁹ A Tikikus keda taveti atu itamiu duagna a Onesimus, na manegna na melehamiu. Imanea huju a kulagu kiloau ke sokara ngasi kori nigna na vaututuni. Iromara koroda atu titionoa itamiu na komi fata ke tate mai eeni.

¹⁰ Aristakus, imanea ke mono duagu kori vathe tatari, ke vetula atua itamiu nigna na haghore dotho. Mak, a tahigna a Banabas, imanea huju e vetula atua mua nigna na haghore dotho. Gi keda mai a Mak itamiu, oti kaliti toetokea vaghagna ku veleghamu ghohi.

¹¹ Jisas, kena kiloagna mua a Justus, imanea ke vetula atua mua nigna na haghore dotho itamiu. Iraani vamua e tolu na mane Jiu kena vaututuni tadia arahai kena agutu duagu bali hatira mai na komi tinoni kori hughuta nigna a God. Tolumara kotolu pukuni vaheta na ghaghanagu.

¹² Sina maneigna mua na melehamiu, a Epafaras, ke vetula atua nigna na haghore dotho itamiu. Imanea nigna na mane agutu a Jisas Krai. Imanea ke tarai eimiu ighamu hahali eigna kotida sokara ngasi kori nimiu na vaututuni moti ado toetokea na hava a God ke magnahaghinighamu kotida eia.

¹³ Inau ku adoa mu veleghamu imanea ke agutu heta bali hatheghamu ighamu koti mono i Kolosi ma na komi tinoni kena vaututuni i Leodisia mi Hierapolis.

¹⁴ A pukuni kulamami, a Luk na dokta, ke

vetula atua mua nigna na haghore dotho itamiu. Vaghagna mua a Dimas.

¹⁵ Oti hera na komi tinoni kena vaututuni i Leodisia nigua na haghore dotho. Oti hera mua tagna a Nimfa ma arahai kena sakai tarai kori vathegna iia.

¹⁶ Leghugna kotida govu na ijumiagna na letasi iaani, oti vetula vanoa itadia na komi tinoni kiloau i Leodisia eigna kedana ijumia mua. Kari ighamu huju kotida ijumia mua na letasi ku risoa atua itadia.

¹⁷ Oti veleagna a Akipus eigna keda eia me ghieghilei vagovua na agutu a God ke hea.

¹⁸ Inau ku vetula nigua na haghore dotho itamiu, mu risoa na vagovui haghore iaani kori limagu ghehegu eigna kotida adoa na letasi iaani ke turughu mai itagua. Oti saghoi havaghiniu inau ku mono kori vathe tatari. Inau ku tarai kaea a God eigna keda vatokeghamu.

Na Rorongō Ke Toke Eigna a Jisas Kraiś
The New Testament in the Bughotu language of the
Solomon Islands
Niu Testament long langguis Bughotu

copyright © 2009 Wycliffe Bible Translators, Inc.

Language: Bughotu

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-13

PDF generated using Haiola and XeLaTeX on 18 Apr 2025 from source files dated 13 Dec 2023

ff048ce1-500f-52e4-9ba7-18fcd6abd5f1